

ISRAELI KATIKA UNABII

Somo la 50



Neno lako ni kweli - Yohana 17:17

Namba ya Whatsap: 0752965019/ +255 757 411 482

ISRAELI KATIKA UNABII

Kitabu cha Ezekieli kina unabii kuhusu taifa la Israeli katika kipindi cha Injili na mipango ya Mungu ya baadaye kwao: “Mkono wa Bwana ulikuwa juu yangu, naye akanitoa katika roho ya Bwana, akaniweka chini kati ya bonde; nalo lilikuwa limejaa mifupa. Akanipitisha karibu nayo pande zote, nami nikaona ya kwamba kulikuwa na mifupa mingi sana juu ya nchi ya bonde, nayo tazama ilikuwa mikavu sana. Akaniambia, Mwanadamu, je! Mifupa hii yaweza kuishi? Nikasema, Ee Bwana MUNGU, wewe ndiwe ujuae. Akaniambia, Toa unabii juu ya mifupa hii, uwaambie, Enyi mifupa mikavu, lisikieni neno la Bwana. Bwana MUNGU awaambia mifupa hii hivi; Angalieni, nitaleta pumzi ndani yenu, nanyi mtaishi. Nitatia mishipa juu yenu, na kuleta nyama juu yenu, na kuwafunikiza ngozi, na kutia pumzi ndani yenu, nanyi mtaishi; nanyi mtajua ya kuwa mimi ndimi Bwana. Basi nikatoa unabii kama nilivyoamriwa; hata nilipokuwa nikitoa unabii, palikuwa na mshindo, na tazama, tetemeko, mifupa ikakaribiana, mfupa kwa mfupa wake. Nikatazama, na tazama, mishipa ilikuwako juu yao, na nyama ilizuka, ngozi ikawafunikiza juu; lakini hapakuwa na pumzi ndani yao. Ndipo akaniambia, Toa unabii kwa hiyo pumzi, toa unabii, Ee mwanadamu, uiambie pumzi, Bwana MUNGU asema hivi, Ewe pumzi, njoo kutoka pepo nne, ukawavuoie hawa waliouawa, wapate kuishi. Basi nikatoa unabii kama alivyoniaturu, na ile pumzi ikaingia ndani yao, nao wakaishi, wakasimama juu ya miguu yao, jeshi kubwa mno sana.” (Ezekieli 37:1-10)

Unabii huu wa “bonde la mifupa mikavu” unahusu “nyumba yote ya Israeli” (aya ya 11). Unatuonyesha mpango wa Mungu kwa Israeli na nafasi ambayo taifa hilo litakuwa nayo katika Ufalme wa Mungu ujao duniani.

Maono haya yaliandikwa wakati wa Israeli walipokuwa mateka Babeli kwa muda wa miaka sabini baada ya kuanguka kwa mfalme wao wa mwisho, **Sedekia**. Hii ilikuwa kati ya mwaka 606 hadi 536 K.K. Pia ndiyo kipindi ambacho Zaburi 137 iliandikwa: “Karibu na mito ya Babeli, huko ndiko tulikoketi, tukalia, tulipolikumbuka Sayuni.” (Zaburi 137:1) Katika hali hii ya huzuni Mungu alimpa Ezekieli maono haya ya wakati ujao. Leo hii, zaidi ya miaka elfu mbili na mia tano baadaye, tunaona utimilifu wake ukiendelea kutokea.

Unabii ulianza wakati Bwana alipomleta Ezekieli katika bonde lililojaa mifupa. Alipoulizwa kama mifupa hiyo yaweza kuishi, alijibu: “*Ee Bwana MUNGU, wewe ndiwe ujuae.*” Ezekieli alijua kuwa jibu la swali hilo linajulikana na Bwana peke yake, na akajibu kwa hekima. Hii ni kanuni nzuri kwetu sote kufuata.

Ezekieli alipoulizwa alikuwa anaona nini, alisema hakujua. Ndipo Mungu akamwagiza atoe unabii kwa hiyo mifupa ili iungane, ivikwe nyama, na ipewe uhai. Mungu alijibu kimapokeo swali la “Je, mifupa hii yaweza kuishi?” Ndiyo, itakuja kuishi tena. Kwa maneno mengine, taifa zima la Israeli, ingawa wakati huo walikuwa mateka kule Babeli, lingefufuliwa tena wakati ujao.

Miaka kadhaa baadaye, chini ya mfalme Koreshi wa Uajemi, Wayahudi waliruhusiwa kurudi katika nchi yao: “Katika mwaka wa kwanza wa Koreshi, mfalme wa Uajemi, ili kutimiza neno la Bwana kwa kinywa cha Yereimia, Bwana akamwamsha roho ya Koreshi, mfalme wa Uajemi, naye akatangaza habari katika ufalme wake wote, tena kwa maandiko, akisema, Koreshi, mfalme wa Uajemi asema hivi, Bwana,

Mungu wa mbinguni, amenipa falme zote za dunia; naye ameniagiza nimjengee nyumba huko Yerusalemu, ulioko Yuda. Basi mtu ye yote miongoni mweni aliye wa watu wake, Bwana Mungu wake na awe pamoja naye, na apande kwenda.” (2 Mambo ya Nyakati 36:22-23)

Hatimaye nchi iliyokuwa ukiwa ya Israeli ilifufuka tena. Hii ilikuwa furaha kuu na jambo la ajabu kwa wale walioshiriki katika kazi ya kuijenga upya. Je, hii ndiyo ilikuwa utimilifu wa maono ya Ezekieli? La! Utumwa huko Babeli ulikuwa mfano tu wa utumwa mkubwa zaidi ambao taifa zima la Israeli lingekumbana nao miaka mingi baadaye baada ya kumkataa Masiha wao. Maono ya Ezekieli yalieleza hali ya Israeli baada ya mwaka 70 B.K., baada ya Yerusalemu kuharibiwa na jeshi la Warumi. Hapo ndipo Israeli walikoma kuwa taifa, watu wakatawanyika, na nchi ikabaki ukiwa:

“Baada ya majuma sitini na mawili, Mpakwa mafuta atakatiliwa mbali, wala hatakuwa na kitu. Na watu wa kuja kwake mfalme huyo watakuja, nao wataharibu mji ule na patakatifu; na mwisho wake utakuwa kama kwa gharika; tena mwisho wa vita umeamriwa ukiwa.” (Danieli 9:26)

Unabii huu wa Danieli ulitimia mwaka 70 B.K. wakati Yerusalemu na hekalu lake vilipoangamizwa na majeshi ya Warumi chini ya Tito. Unabii ulisema *“vita vitaendelea hata mwisho, ukiwa umeamriwa.”* Hii ni kipindi baada ya mwaka 70 B.K., baada ya *“vita”* hiyo ambapo nchi ya Israeli ilibaki ukiwa na watu wake kutawanyika katika mataifa yote:

“Naliwatawanya kwa upepo wa kisulisuli katika mataifa yote, wasiojulikana kwao; nchi ikaachwa ukiwa nyuma yao, asiwepo mtu aendaye wala arudie; ndivyo walivyofanya nchi ya kupendeza kuwa ukiwa.” (Zekaria 7:14)

Hali ya taifa la Israeli baada ya mwaka 70 B.K. ilifananishwa na mateka yao ya Babeli yaliyoanza mwaka 606 K.K. Babeli wakati huo

ilikuwa dola ya kwanza ya ulimwengu – miongoni mwa milki nne za dunia – na ikawa mfano wa mahali ambapo Wayahudi wangetawanyika, yaani utumwa wa mbali na nchi yao wenyewe. Adhabu yao ya “miaka sabini” ilikuwa kipindi kilichopangwa mapema cha mateso yao, kama ilivyotamkwa na Mungu kupitia Yeremia:

“Nchi ikafurahia sabato zake; siku zote za ukiwa wake ikastarehe, hata miaka sabini ikatimia, kwa kuitimiza neno la Bwana alilolinena kwa kinywa cha Yeremia.” (2 Mambo ya Nyakati 36:21)

Kipindi hiki kilichowekwa cha utumwa ni mfano wa kipindi kilichopangwa cha ukiwa kwa Israeli baada ya mwaka 70 B.K.:

“Rudini ngome yenu, enyi wafungwa wenye tumaini; hata hivi leo natangaza ya kwamba nitakurudishia mara mbili.” (Zekaria 9:12) “Nami nitawalipa kwa kadiri ya uovu wao, na kwa kadiri ya dhambi zao mbili; kwa sababu wameinajisi nchi yangu kwa miili ya sanamu zao zisizo na uhai, na wameijaza urithi wangu machukizo yao.” (Yeremia 16:18)

Yeremia anataja kipindi hiki kama “mara mbili.” Mungu angemwadhibu Israeli kwa muda sawa na ule aliowahi kuwapa kibali na baraka. Kipindi hicho kilianza na kifo cha Yakobo ambapo kipindi cha Mababa-(*Patriarchal age*) kilikoma, na kilikamilika Yesu alipotamka hukumu juu ya Israeli: “Tazama, nyumba yenu mmeachiwa hali ya ukiwa.” (*Mathayo 23:38*)

Yesu aliyasema maneno haya wiki chache kabla ya kifo chake mwaka 33 B.K. Yakobo alikufa mwaka 1812 K.K., hivyo kipindi cha kibali kwa Israeli kilikuwa miaka $1,812 + 33 = 1,845$. Hivyo basi, adhabu ya Israeli ingeendelea kwa miaka 1,845 kuanzia mwaka 33 B.K., na ilifikia mwisho wake mwaka 1878 B.K.

Kuachiwa kwa Israeli kutoka katika utumwa wao katika mwanzo wa utawala wa Koreshi kulifananisha kuachiliwa kwao kutoka katika adhabu mwaka 1878. Katika kipindi hicho, Israeli ingeweza kujieleza kwa maneno haya:

“Mifupa yetu imekauka, na tumekosa tumaini; tumekatwa mbali.” (Ezekieli 37:11)

Hii ilikuwa hali yao katika kipindi cha Injili ambapo tumaini lao na imani yao juu ya ahadi za Mungu alizopewa Ibrahimu ilionekana kufa kabisa.

“Mifupa” inawakilisha taifa la Israeli na watu wake wakiwa katika hali ya utumwa; **“imekauka”** humaanisha wamepoteza tumaini.

“Basi toa unabii, uwaambie, Bwana MUNGU asema hivi; Tazama, nitafunua makaburi yenu, nami nitawapandisha kutoka makaburini mweni, enyi watu wangu; nami nitawatia roho yangu, nanyi mtaishi; nami nitawakalisha katika nchi yenu; nanyi mtajua ya kuwa mimi, Bwana, nimenena, nami nimelitenda, asema Bwana.” (Ezekieli 37:12-14)

Kufungua makaburi

kunawakilisha

kurudishwa kwa

uzima wa taifa la

Israeli na kufufuka

kwa matumaini yao ya

Kimasihi. Katika

maono, mifupa

ilikusanyika kwa

kishindo kikubwa,

lakini bado haikuwa



na uhai hadi pumzi ya uhai ilipoingia ndani yao. Maelezo ya nabii ni ya dhahiri kabisa :

“Pumzi ikaingia ndani yao, nao wakaishi, wakasimama juu ya miguu yao, jeshi kubwa mno sana.”(Ezekieli 37:10)

“Basi nikatoa unabii kama alivyonihamuru; hata nilipokuwa nikitoa unabii, palikuwa na kelele, na tazama, tetemeko, mifupa ikakaribiana, mfupa kwa mfupa wake.”(Ezekieli 37:7)

“Palikuwa na kelele” humaanisha kurudi kwa uhai kwa matumaini ya Israeli wakati wa kipindi kilichoitwa “Kelele.” Kipindi hiki hasa ni sauti ya tarumbeta ya saba kama ilivyotajwa katika Ufunuo 11:15, ambayo ilianza kipindi cha mwisho cha kanisa mwaka 1874. Katika kipindi hiki, kweli zilihubiriwa na malaika wa saba, ikiwa ni pamoja na ukweli kuhusu kurejeshwa kwa taifa la Israeli. Matokeo ya kutangazwa kwa kweli hizi yalikuwa ni “Kelele”—yaani sauti ya mifupa ikakaribiana. Sehemu hii ya maono yaonesha njia ambayo *“mifupa ikakaribiana”*, jinsi watu wa Israeli wangekusanywa kutoka katika nchi zote walikotawanyika.

Njia ya kukusanywa huku ilielezwa na Yereimia:

“Lakini Bwana aishi, aliyewaleta wana wa Israeli kutoka nchi ya kaskazini, na kutoka nchi zote walikokuwa wamefukuzwa; nami nitawarudisha katika nchi niliyowapa baba zao. Tazama, nitawatuma wavuvi wengi, asema Bwana, nao watawawua; na baada ya hayo nitawatuma wawindaji wengi, nao watawawinda juu ya kila mlima, na juu ya kila kilima, na katika mashimo ya miamba.”(Yereimia 16:15-16)

Bwana alisema kwamba angewakusanya tena kwa kutumia njia mbili. Wa kwanza walikuwa “wavuvi.” Mwaka 1878, Petah Tikvah ikawa kijiji cha kwanza kuanzishwa na Wayahudi katika nchi ya Israeli. Hii ilikuwa mojawapo ya mafanikio ya mwanzo ya harakati za Kisayuni (Zionist Movements) zilizoanzishwa na Theodor Herzl, Myahudi kutoka Uswisi. Mvuvi hutumia chambo ili kuvutia samaki. “**Chambo**” cha uzayuni kilikuwa ni ahadi za Biblia, kama vile:

“Mdogo atakuwa elfu, na mnyonge taifa lenye nguvu; Mimi Bwana, nitayatimiza hayo kwa wakati wake kwa haraka.” (Isaya 60:22)

Hii ilikuwa ni ahadi ya Mungu ya kuifanya Israeli kuwa **taifa lenye nguvu** ingawa lilikuwa dogo katikati ya mataifa makubwa duniani.

“Chambo” kine kilitolewa kwa njia ya motisha maalum katika taifa hilo jipya “lililokuwa linazaliwa” na kwa kuhamasisha ununuzi wa ardhi. Lakini Wayahudi wachache tu walirudi.

Hivyo Bwana akatumia njia ya pili — “**wawindaji**.” Hawa walikuwa ni harakati mbalimbali za kupinga Usayuni katika mataifa mbalimbali ambazo ziliwalazimisha Wayahudi kuondoka; waliwindwa kutoka nchi walimokuwa wamekimbia. Awamu hii ya wawindaji ilifikia kilele chake katika mauaji ya Wayahudi yaliyofanywa na Wanazi wakati wa Vita ya Pili ya Dunia katika miaka ya 1940. Takriban Wayahudi milioni sita waliuawa na **Adolph Hitler** katika vyumba vya gesi vya kambi za mateso za Wanazi.

Baada ya Vita ya Pili ya Dunia kumalizika, Wayahudi kwa idadi kubwa walianza kurudi katika “nchi yao ya kale.” Kurudi huko kuliongezeka kwa kasi na hali mbalimbali ziliungana kuleta “kuzaliwa” kwa taifa jipya la Israeli tarehe 14 Mei 1948, katika nchi

ambayo Mungu aliwapa baba zao. Huu ulikuwa ni muujiza! Hakujawahi kutokea **kabla ambapo taifa lilitoweka kwa karibu miaka 1,900, halafu likarejeshwa tena.**

Maono ya Ezekieli yaliendelea: *“Nikatazama, na tazama, mishipa ilikuwako juu yao, na nyama ilizuka, ngozi ikawafunikiza juu; lakini hapakuwa na pumzi ndani yao.”* (Ezekieli 37:8)

Mishipa inawakilisha misuli na nguvu—yaani uchumi wa taifa na ulinzi wake. Baada ya mwaka 1948, fedha nyingi zilimwagwa kutoka kwa Wayahudi matajiri waliokuwa nje ya nchi ili kujenga uchumi wa taifa jipya. Wakati huohuo, jeshi liliundwa—jeshi la ardhini, la majini, na la anga. Israeli ilibidi ipigane na majeshi ya mataifa saba ya Kiarabu mara tu ilipojitangaza kuwa taifa. Taifa hilo lilishinda kwa ushindi mkubwa, jambo ambalo lilikuwa muujiza mwingine. Hapo ndipo **“mishipa” ilianza kuonekana.**

“Na nyama ikazuka juu yao.” Nyama inawakilisha miundombinu ya taifa. Polepole, taifa la Israeli lilianza kuchukua umbo. Mfumo wa serikali, viwanda katika sekta mbalimbali, na kilimo vilianzishwa kwa utaratibu mzuri ili kutumia rasilimali zilizopo kikamilifu. Mashamba ya kikibbutz, hospitali, shule, benki, huduma ya posta, usafiri, vyuo, vituo vya utafiti na huduma nyingine zote zilianzishwa.

“Nao wakafunikwa na ngozi.” Ngozi inawakilisha ukamilifu wa taifa—yaani kuwa taifa kamili linalotambuliwa rasmi. Israeli ilipokelewa kama mwanachama wa Umoja wa Mataifa mwaka 1949. Ilianzisha uhusiano wa kidiplomasia na mataifa mengine na kualika mataifa hayo kufungua balozi ndani ya Israeli. Leo hii mtu anaweza kusema kwa hakika: *“Ngozi imewafunika.”*

Lakini **“hapakuwa na pumzi ndani yao.”** “Pumzi” ambayo Israeli bado hawajapokea ni Roho Mtakatifu wa Mungu, ambayo huleta uzima kama ilivyokuwa kwa kanisa:

“Lakini Kristo akiwa ndani yenu, mwili wenu umekufa kwa sababu ya dhambi; lakini roho ni uzima kwa sababu ya haki. Lakini ikiwa Roho wake yeye aliyemfufua Yesu katika wafu anakaa ndani yenu, yeye aliyemfufua Kristo Yesu katika wafu ataihuisha miili yenu iliyo katika hali ya kufa kwa roho yake inayokaa ndani yenu.” (Warumi 8:10-11)

Hatimaye, taifa la Israeli litapokea *“pumzi”*, yaani Roho Mtakatifu wa Mungu.

Ezekieli alimtii Mungu kama alivyoagizwa: *“Basi nikatoa unabii kama alivyoniamuru, na ile pumzi ikaingia ndani yao, nao wakaishi, wakasimama juu ya miguu yao, jeshi kubwa mno sana.”* (Ezekieli 37:10) *“Pumzi”* inayowakilisha Roho Mtakatifu itakuja juu ya Israeli kutoka kwa *“pepo nne.”* Pepo hizi zimetajwa katika kitabu cha Ufunuo:

“Baada ya hayo nikawaona malaika wanne wamesimama katika pembe nne za dunia, wakiizuia pepo nne za dunia, ili pepo yoyote isivume juu ya nchi, wala juu ya bahari, wala juu ya mti wo wote.” (Ufunuo 7:1)

Pepo nne kutoka pembe nne za dunia huunda kisulisuli, na kisulisuli huharibu kila kilicho mbele yake. *“Pepo nne za dunia”* ni picha ya taabu kuu itakayojitokeza kwa wakati mmoja kutoka sehemu nne kuu za utawala wa dunia: Serikali, Jamii, Dini, na Fedha—na ndicho kitakachofikisha kipindi cha Injili mwisho. Hii ndiyo *“nyakati za taabu kuu.”*

Hili pia limechorwa katika kitabu cha Danieli:

“Ndipo chuma, na udongo, na shaba, na fedha, na dhahabu, vilivunjika vipande vipande kwa wakati mmoja, vikawa kama makapi ya viwanja vya kupuria wakati wa hari; upepo ukavipeperusha hata pasionekane mahali pake.” (Danieli 2:35)

Upepo huu ni picha ya taabu kuu itakayoangamiza ulimwengu huu wa sasa wa uovu. Ni wakati huu ndipo *“pepo nne”* zitasababisha Israeli kupokea Roho Mtakatifu. Hili litafanyika kwa kuwa kilele cha taabu hiyo kitakuwa nchini Israeli. Maandiko yanaita hili

“Taabu ya Yakobo”:

“Maana, angalia, siku zinakuja, asema Bwana, nitakapowarudisha tena watu wangu Israeli na Yuda kutoka nchi ya uhamisho, nao watarudi katika nchi niliyowapa baba zao, na kuimiliki. Na haya ndiyo maneno aliyoyanena Bwana juu ya Israeli na juu ya Yuda. Maana Bwana asema hivi; Tumesikia sauti ya kutetemeka, ya hofu, wala si ya amani. Ulizeni sasa mkaone, je! Mwanamume huzaa? Mbona basi naona kila mtu anaweka mikono yake viunoni kama mwanamke azaaye, na nyuso zote zimegeuka rangi? Ole wake! Maana siku ile ni kubwa, hata hapana mfano wake; ni wakati wa taabu ya Yakobo; lakini ataokolewa na hiyo.” (Yeremia 30:3-7)

Tunaishi katika kipindi ambacho andiko hili liko karibu kutimia: *“Ujitayarishe, naam, jiandae, wewe na makutano yako yote yajikusanyayo juu yako, ukawaongoze. Baada ya siku nyingi utajiliwa maagizo; katika miaka ya mwisho utakuja katika nchi iliyo na watu waliopona upanga, waliokusanywa kutoka katika mataifa mengi, wakaja juu ya milima ya Israeli, ambayo imekuwa ukiwa kwa muda mrefu; lakini wameletwa kutoka mataifa, nao wote hukaa huko salama. Wewe na watu wako wote, na mataifa mengi*

pamoja nawe, mtapanda, mtakuja kama tufani; mtakuwa kama wingu linaloifunika nchi.” (Ezekieli 38:7-9)

Kutakuwa na uvamizi dhidi ya Israeli kutoka kwa mataifa mengi: *“Siku ile Bwana atawalinda wakaao Yerusalemu; hata yeye aliye dhaifu miongoni mwao siku ile atakuwa kama Daudi; na nyumba ya Daudi itakuwa kama Mungu, kama malaika wa Bwana mbele yao. Tena itakuwa siku ile, nitatafuta kuiharibu jamii zote zitakazokuja kupigana na Yerusalemu.” (Zekaria 12:8-9)*

Mungu atapigania Israeli nao watashinda. Ndivyo vita vya mwisho vinavyoelezwa:

“Na hii ndiyo tauni ambayo Bwana atawapiga kwa hiyo mataifa waliopigana na Yerusalemu; nyama zao zitaoza hali wamesimama juu ya miguu yao, na macho yao yataoza ndani ya matundu ya macho yao, na ndimi zao zitaoza ndani ya vinywa vyao.” (Zekaria 14:12)

Maneno haya yanaweza kueleza athari za mionzi ya nyuklia. Lakini Israeli watalindwa kwa namna ya pekee, na *“pumzi”*, yaani Roho Mtakatifu wa Mungu, itamwagwa juu yao:

“Wala sitauficha uso wangu tena kwao; maana nitamimina roho yangu juu ya nyumba ya Israeli, asema Bwana MUNGU.” (Ezekieli 39:29)

Mungu atakapoanza kumimina Roho yake *“juu ya wote wenye mwili,”* ataanza na taifa la Israeli.

Hapo ndipo maono ya bonde la mifupa mikavu yatakapokuwa yametimia kikamilifu. Taifa la Israeli litaishi na kuwa *“jeshi kubwa mno sana.”* Kupitia Wayahudi, ulimwengu wote utafundishwa Neno la Mungu na kweli:


"Bwana wa majeshi asema hivi, Itakuwa siku zile, watu kumi kutoka katika lugha zote za mataifa wataushika pindo la kanzu ya Myahudi mmoja, wakisema, Tutakwenda pamoja nawe, kwa maana tumesikia ya kuwa Mungu yu pamoja nanyi." (Zekaria 8:23)

Mataifa yote yatamiminika Yerusalemu ili kujifunza na kupokea baraka za Ufalme wa Mungu:

"Itakuwa katika siku za mwisho, mlima wa nyumba ya Bwana utathibitishwa juu ya milima, nao utainuliwa juu ya vilima; na mataifa yote watauendea. Na mataifa mengi watakwenda wakisema, Njoni, twende juu mlimani kwa Bwana, nyumbani kwa Mungu wa Yakobo; naye atatufundisha njia zake, nasi tutakwenda katika mapito yake; kwa maana katika Sayuni itatoka sheria, na neno la Bwana kutoka Yerusalemu." (Isaya 2:2-3)

Ni hatima ya utukufu iliyoje inayolikabili taifa la Israeli!

❀=❀=❀Amina❀=❀=❀=



Kwa Masomo zaidi Tuandikie Ujumbe kupitia:

Email: thekingdom1_6@gmail.com au isayaruhala25@gmail.com

©HAKIUZWI

Namba ya Whatsap: 0752965019/ +255 757 411 482